

AJARAN KAMI

**JEMAAT AHMADIYAH MUSLIM MALAYSIA
2013**

AJARAN KAMI

Diterjemahkan dari buku:

Hamari Ta'lim (URDU)

Mirza Bashir Ahmad

Rabwah.

Ringkasan daripada ajaran Pendiri Jemaat Ahmadiyah

Dalam perkataan beliau sendiri

Dipetik daripada kitab Bahtera Nuh (Kisyti Nuh)

Karya:

Hazrat Mirza Ghulam Ahmad Qadiani

Imam Mahdi & Nabi Isa yang dijanjikan

Cetakan Pertama 2013

Penerbit:

PUSTAKA BAITUSSALAM

11 A, Jalan Nakhoda Kanan, Kg. Nakhoda,
68100 Batu Caves, Selangor Darul Ehsan.

Tel: 03-6189 6715 Fax: 03-6189 4732

ISI KANDUNGAN

Ajaran Kami	1
Jangan Takut Akan Laknat Dunia	4
Memuliakan Al-Qur'an Mendapat Kemuliaan Di Atas Langit	7
Wahai Mereka Yang Berada Dalam Jemaatku!	9
Rasulullah Sallallaahu Alaihi Wasallam Khatamul Anbiya	11
Siapa Yang Diakui Dalam Jemaatku Dan Siapa Tidak?	12
Tuhan Memiliki Kekuatan-Kekuatan Yang Luar Biasa	15
Tuhan Adalah Penyokong Dalam Segala Pekerjaan Kita	17
Berhati-Hatilah! Jangan Turuti Adat Kaum Lain	19
Pintu Wahyu Sekarang Pun Masih Terbuka	22
Kedudukan Al-Qur'an Yang Tinggi	24
Kedudukan Penjelasan Sunnah	26
Kedudukan Hadis Sebagai Penyokong	27
Keyakinan Sempurna Cara Menyelamatkan Diri Dari Dosa	31
Jangan Gembira Atas Kisah-Kisah	34
Memperoleh Kesucian Melalui Solat	36
Wahai Orang Kaya Dan Orang Berharta	37
Wahai Para Ulama Islam!	39
Golongan Pemerintah Dan Bangsawan Negara	41
Sekarang Ini Masa Berkhidmat Untuk Agama	42



AJARAN KAMI

Hendaknya hal ini difahami dengan jelas bahwa melafazkan janji bai'at hanya di atas lidah sahaja tidak bererti apa-apa selagi tidak melaksanakannya dengan sepenuh hati. Oleh karena itu barangsiapa yang mengamalkan ajaranku ini dengan sepenuh hati, maka mereka akan masuk ke dalam rumah yang berkenaan dengannya ada janji dari Allah Ta'ala bahawa:

إِنِّي أَحَافِظُ كُلَّ مَنْ فِي الدَّارِ

Yakni “*Aku akan selamatkan setiap orang yang berada di dalam empat penjuru dinding rumahmu*”.

Tetapi, dalam hal ini janganlah disalahertikan bahawa perlindungan Ilahi ini hanya diberikan kepada mereka yang tinggal di dalam rumahku yang diperbuat daripada tanah dan batu-bata ini, malah orang yang benar-benar mengikuti aku juga termasuk dalam rumah rohaniku.

Untuk mengikuti ajaranku, perkara ini adalah sangat perlu sekali iaitu mereka harus yakin bahawa mereka mempunyai satu Tuhan Yang Qadir (Yang Maha Kuasa), Qayyum (Yang Berdiri

Sendiri), dan Khaaliqul Kul (Pencipta segala sesuatu), yang dalam sifat-sifat-Nya adalah azali, abadi dan tidak mengalami sebarang perubahan. Dia tidak diperanakkan dan tidak mempunyai anak. Dia tidak menanggung kesusahan dan bersih dari peristiwa dinaikkan ke atas salib dan mati di atasnya.

Tuhan adalah sedemikian rupa, bahawa meski pun berada jauh namun Dia dekat, dan walaupun berada dekat namun Dia jauh. Walaupun Tunggal tetapi penjelmaan-Nya dalam pelbagai bentuk. Apabila terjadi suatu perubahan bentuk yang baru dalam diri seorang insan, maka bagi orang itu Allah menjadi Tuhan yang baru, dan dia diperlakukan dengan satu penjelmaan-Nya yang baru. Dan seseorang itu melihat suatu perubahan dalam Wujud Tuhan menurut perubahan yang ada pada dirinya.

Tetapi hal ini bukanlah bererti ada terjadi suatu perubahan dalam Wujud Tuhan, malah sesungguhnya Dia tidak pernah mengalami suatu perubahan sejak azali lagi, dan Wujud-Nya memang sempurna. Tetapi dengan tiap-tiap perubahan yang berlaku dalam diri manusia yang menjurus ke arah kebaikan, Tuhan pun menjelmakan diri-Nya terhadap orang itu dalam bentuk penjelmaan baru. Dan setiap kali muncul kemajuan dalam diri insan, maka Tuhan pun memperlihatkan diri-Nya dengan penjelmaan yang lebih agung lagi perkasa.

Dia memperlihatkan Kudrat-Nya yang luar biasa hanya apabila manusia memperlihatkan suatu perubahan luar biasa dalam dirinya. Inilah akar dari keajaiban dan mukjizat-mukjizat. Keimanan kepada Tuhan seperti inilah yang menjadi syarat dalam jemaat kita. Jadi, resapkanlah keimanan ini ke dalam kalbu kamu sekalian. Berikanlah keutamaan kepada keimanan itu mengatasi jiwa kamu, kesenangan-kesenangan kamu, dan segala hubungan-hubungan kamu. Dan juga perlihatkanlah kejujuran dan kesucian pada jalan-Nya disertai dengan keberanian secara nyata. Orang-orang dunia tidak memberi keutamaan kepada-Nya berbanding harta benda dan kaum kerabat mereka, akan tetapi kamu harus

memberikan keutamaan kepada-Nya, sehingga kamu dituliskan di atas langit dalam daftar jemaat-Nya.

Memperlihatkan tanda-tanda rahmat adalah adat kebiasaan Tuhan semenjak zaman dahulu lagi. Tetapi kamu boleh mengambil bahagian dalam kebiasaan ini hanya apabila tidak ada suatu sebab yang memisahkan kamu dari-Nya, dan apabila kesukaan kamu menjadi kesukaan-Nya, dan kehendak kamu menjadi kehendak-Nya, dan kegembiraan kamu setiap masa, dan dalam setiap keadaan sama ada berhasil atau gagal, kamu tetap setia di istana-Nya sehingga apa yang Dia inginkan, kamu melakukannya dan menyerah kepada segala kehendak-Nya.

Jika kamu berbuat sedemikian, maka di dalam diri kamu akan kelihatan Wujud Tuhan yang sudah lama menyembunyikan Wajah-Nya. Apakah ada di antara kamu sekalian yang mengamalkan **ajaran** ini? Yang hanya mencari keredhaan-Nya? Dan yang tidak marah atas qadha' dan qadar-Nya?

Jadi, apabila kamu menghadapi suatu musibah, maka kamu harus melangkah terus ke hadapan kerana itu adalah sarana keberhasilan bagi kamu, dan kamu hendaklah berusaha dengan sepenuh kekuatan kamu untuk menyebarkan ketauhidan-Nya di atas muka bumi, dan kamu hendaklah berbelas-kasih kepada hamba-hamba Allah, dan janganlah berlaku aniaya terhadap mereka sama ada dengan mulut kamu, atau tangan kamu, atau dengan cara-cara lainnya.

Berusahalah untuk terus mendatangkan kebaikan kepada umat manusia. Janganlah sombong terhadap sesiapa walaupun orang bawahan kamu. Janganlah menghina orang lain walaupun orang itu menghina kamu. Hendaklah kamu bersikap merendah diri, lemah-lembut, baik hati dan bersimpati terhadap sesama makhluk sehingga kamu diterima di sisi Allah.

Banyak orang yang memperlihatkan diri seakan-akan mereka itu mempunyai peribadi yang lemah-lembut, padahal dalam diri mereka sama seperti tabiat serigala. Banyak orang yang secara

zahir kelihatan sangat bersih sedangkan dalam hati mereka itu umpama ular berbisa. Jadi, kamu tidak akan diterima di sisi Allah seandainya zahir dan batin kamu tidak sama keadaannya.

Sekiranya kamu orang besar, kasihilah mereka yang kecil, dan jangan menghina mereka. Seandainya kamu terpelajar, berilah nasihat kepada orang-orang bodoh, dan bukannya merendahkan-rendahkan mereka. Jika kamu seorang yang kaya, khidmatilah orang-orang miskin dan bukannya meninggi diri dan sombong atas mereka.

Takutlah kepada langkah-langkah yang boleh membawa ke arah kehancuran. Takutlah kepada Tuhan dan berjalanlah di atas landasan takwa. Janganlah menyembah makhluk Allah. Hadapkanlah seluruh perhatian kamu kepada Allah supaya perhatian kamu kepada dunia ini menjadi tawar dan berkurangan. Dan jadilah kamu milik-Nya dan jalanilah kehidupan kamu semata-mata untuk Allah, tanamkan kebencian terhadap segala kekotoran dan dosa kerana Dia itu Suci. Setiap kali waktu pagi, hendaknya memberi kesaksian bahawa kamu telah melalui waktu malam dengan penuh ketakwaan, dan setiap waktu petang hendaknya menjadi saksi bahawa kamu telah melalui waktu siang dengan ketakutan di dalam hati terhadap Allah.

Jangan Takut Akan Laknat Dunia

Janganlah takut akan laknat dunia, sebab laknat itu lamakelamaan akan lenyap dengan sendirinya bagaikan asap yang hilang di udara. Ia tidak dapat mengubah siang menjadi malam. Apa yang kamu harus takut ialah laknat Tuhan yang turun dari langit, iaitu laknat yang boleh membinasakan seseorang di dunia dan akhirat.

Kamu tidak dapat menyelamatkan diri kamu dengan sikap menunjuk-nunjuk, sebab Allah iaitu Tuhan kamu dapat melihat sampai ke dasar lubuk hati manusia. Adakah kamu dapat menipu

Tuhan? Justeru itu, luruskanlah hati kamu, bersihkanlah serta sucikanlah batin kamu dan berdirilah di atasnya dengan seteguh-teguhnyanya, sebab apabila di dalam diri kamu terdapat sekelumit pun kegelapan, maka akan dihalaunya cahaya nurani kamu. Dan seandainya di suatu sudut dalam diri kamu ada terselit sifat keangkuhan, riak, pentingkan diri sendiri, atau kemalasan, maka kamu tidak dapat dianggap sebagai sesuatu yang layak diterima oleh Tuhan.

Jangan sampai hanya disebabkan bakti yang sedikit, kamu menipu diri kamu sendiri dengan berkata: *Apa yang seharusnya perlu dilakukan telah pun kami kerjakan.* Ini kerana Tuhan menghendaki supaya di dalam wujud kamu terjadi suatu revolusi yang menyeluruh. Dan Dia menuntut dari kamu suatu maut (kematian), yang mana sesudah maut itu, Dia akan menghidupkan kamu.

Jadi, segeralah berdamai antara satu sama lain dan maafkanlah kesalahan-kesalahan saudara kamu, sebab sungguh jahat orang yang tidak suka berdamai dengan saudaranya. Dia akan disingkirkan kerana telah cuba menanam benih perpecahan.

Tinggalkanlah segala keinginan untuk mengikuti hawa-nafsu, dan biarkan kemarahan sesama kamu berlalu pergi. Walaupun kamu berada di pihak yang benar, bersikaplah merendahkan diri seolah-olah kamu yang bersalah, supaya kamu diberikan keampunan. Tinggalkanlah segala sesuatu yang boleh menggemukkan hawa nafsu kamu, sebab pintu di mana kamu dipersilakan masuk tidak dapat dilalui oleh orang yang gemuk hawa nafsunya.

Alangkah malangnya orang yang tidak mempercayai apa yang difirmankan oleh Tuhan, dan apa yang telah aku sampaikan kepada kamu. Sekiranya kamu mahu agar Tuhan di langit suka kepada kamu, maka segeralah kamu bersatu-padu laksana saudara sekandung yang lahir dari seorang ibu. Di antara kamu sekalian orang yang mulia adalah orang yang suka mengampuni kesalahan

saudaranya, dan orang yang malang pula adalah orang yang keras kepala dan tidak bersedia memaafkan kesalahan orang lain, sebab itu dia bukan dari golonganku.

Hendaklah kamu senantiasa takut terhadap laknat Allah sebab Dia itu Qudus dan sangat besar gairah (emosi)-Nya. Setiap orang yang berkelakuan buruk tidak akan dapat memperoleh qurub (kedekatan) kepada Tuhan, orang yang sombong juga tidak akan mendapat qurub-Nya, orang zalim tidak akan dekat kepada-Nya, orang yang khianat tidak akan dekat kepada-Nya, dan begitu juga orang yang tidak merasa teruja apabila mendengar nama-Nya tidak akan dekat kepada-Nya. Demikian juga halnya orang-orang yang cenderung ke arah dunia dan merasa selesa di atasnya seperti halnya seekor anjing, semut atau burung helang, mereka ini juga tidak akan dapat memperolehi qurub (kedekatan) kepada Allah.

Setiap orang yang tidak bersih matanya akan renggang dengan-Nya, setiap orang yang kotor hatinya tidak akan dapat mengetahui-Nya. Barangsiapa yang sanggup menderita di dalam api untuk-Nya akan diselamatkan dari api. Barangsiapa yang menangis karena-Nya akan tertawa gembira. Barangsiapa yang menyisihkan diri dari urusan-urusan dunia demi untuk-Nya, dia akan bertemu dengan-Nya.

Dengan kesungguhan hati dan dengan penuh ketulusan serta dengan langkah-langkah yang bersemangat, jadilah kamu sahabat Tuhan, supaya Tuhan pun akan menjadi sahabat kamu. Perhatikanlah kasih sayang terhadap orang-orang bawahan kamu, isteri-isteri kamu, dan saudara-saudara kamu yang miskin, supaya kamu pun diberikan kasih sayang di atas langit.

Jadilah kamu kepunyaan-Nya dengan cara yang sebenar-benarnya agar Dia pun menjadi kepunyaan kamu. Dunia ini tempat ribuan bencana, musibat dan malapetaka. Jadi, kamu hendaklah berpegang-teguh dengan sebenar-benarnya kepada Allah supaya Dia menjauhkan bencana itu dari kamu.

Tidak ada bencana yang akan timbul di atas permukaan bumi ini tanpa suatu perintah dari langit, dan tidak ada bencana yang boleh hilang selagi belum datang kasih sayang dari langit. Oleh kerana itu kebijaksanaan kamu kelihatan apabila kamu berpegang pada akar dan bukan pada ranting. Kamu tidak dilarang dari ubat-ubatan dan mencari ikhtiar atau berusaha, tetapi yang dilarang ialah bergantung sepenuhnya atas hal-hal itu, sebab pada akhirnya adalah kehendak Allah juga yang akan berjalan. Jika ada yang berkemampuan, maka kedudukan tawakkal itu lebih tinggi berbanding yang lain.

Memuliakan Al-Qur'an Mendapat Kemuliaan Di Atas Langit

Ada satu ajaran yang sangat penting untuk kamu iaitu jangan memperlakukan Qur'an Syarif seperti sebuah barang yang telah dilupakan kerana di dalamnya terletak sumber kehidupan kamu. Barangsiapa yang memuliakan Qur'an Syarif akan memperoleh kemuliaan di atas langit. Barangsiapa yang menjunjung tinggi Qur'an Syarif di atas segala hadis dan segala ucapan-ucapan yang lain, dia akan diberi keutamaan di atas langit. Kini, bagi umat manusia di atas permukaan bumi ini tidak ada kitab selain Qur'an Syarif, dan bagi seluruh anak-anak Adam tidak ada rasul dan pemberi syafaat selain Muhammad Mustafa sallallaahu alaihi wasallam.

Oleh sebab itu, berusahalah kamu sekalian untuk mendambakan kecintaan yang semurni-murninya bagi Nabi yang agung ini, dan janganlah memberikan kepada sesiapa pun sesuatu tempat yang lebih tinggi daripada baginda, supaya kamu ditulis dalam golongan orang-orang yang telah diselamatkan. Dan ingatlah dengan sebaik-baiknya, bahwa najat (keselamatan) bukanlah hal yang berlaku selepas mati, malah najat (keselamatan) yang hakiki itu memperlihatkan cahayanya di alam dunia ini juga.

Siapakah yang telah beroleh najat (keselamatan) itu? Mereka itu ialah orang-orang yang benar-benar yakin bahawa Tuhan adalah suatu perkara yang nyata dan Muhammad sallallaahu alaihi wasallam adalah pemberi syafaat di antara Tuhan dan seluruh umat manusia, dan di bawah langit ini tidak ada Rasul lain yang semartabat dengan baginda, dan tidak ada kitab lain yang sederajat dengan Qur'an Syarif, dan Tuhan tidak menginginkan sesiapa pun untuk hidup kekal kecuali Nabi terpilih ini.

Dan untuk menjadikan baginda hidup selama-lamanya, Tuhan telah meletakkan dasar ini untuk menjadikan kurnia syariat dan keberkatan rohani berterusan sehingga Hari Kiamat. Dan pada akhirnya, atas berkat rohaninya, Tuhan mengutus kepada umat manusia seorang **Maseeh Mau'ud** (Al-Maseeh yang dijanjikan) ke dunia ini, yang kedatangannya sangat diperlukan untuk menyempurnakan bangunan Islam. Sebab, jangan sampai dunia ini berakhir sebelum Jemaat Muhammadi sallallaahu alaihi wasallam diberikan seorang Maseeh rohani, seperti yang telah diberikan kepada Jemaat Musawi. Inilah yang diisyaratkan dalam ayat ini:

إِهْدِنَا الصِّرَاطَ الْمُسْتَقِيمَ ۝ صِرَاطَ الَّذِينَ أَنْعَمْتَ عَلَيْهِمْ

Yakni “Tunjukilah kami pada jalan yang lurus, (iaitu) jalan orang-orang yang telah Engkau beri nikmat atas mereka” (Al-Fatihah:6,7)

Musa alaihissalam memperolehi harta karun yang telah hilang berabad-abad yang lampau, sedangkan Muhammad sallallaahu alaihi wasallam memperolehi harta karun yang telah hilang dari Jemaat Musawi. Sekarang Jemaat Muhammad sallallaahu alaihi wasallam telah menggantikan Jemaat Musa alaihissalam, dan tingkat kebesaran dan keagungannya ribuan kali ganda lebih tinggi. Orang yang menjadi misal (perumpaan) Musawi lebih

unggul berbanding Musa alaihissalam sendiri, demikian juga orang yang menjadi misal Isa Ibnu Maryam sudah tentu akan lebih baik dari Isa Ibnu Maryam sendiri.

Dan Maseeh Mau'ud (Al-Maseeh yang dijanjikan) tidak hanya datang menurut jangka waktunya tepat 14 abad sesudah Rasulullah sallallaahu alaihi wasallam sebagaimana **Al-Maseeh (Nabi Isa)** Ibnu Maryam yang datang 14 abad selepas Nabi Musa alaihissalam, malah dia telah datang ketika keadaan semasa kaum Muslimin serupa dengan keadaan orang-orang Yahudi pada waktu Maseeh (Isa) Ibnu Maryam datang. Jadi, orang yang dimaksudkan itu adalah aku sendiri. Tuhan melakukan apa yang Dia kehendaki. Adalah bodoh orang yang berperang dengan-Nya dan adalah jahil orang yang cuba mengkritik pekerjaan-Nya dengan mengatakan '*tidak seperti itu, seharusnya ini yang terjadi*'.

Wahai Mereka Yang Berada Dalam Jemaatku!

Oleh karena itu, wahai sekalian orang yang merasa dirinya diakui sebagai warga Jemaatku, kamu sekalian di langit akan dianggap sebagai warga Jemaatku apabila kamu benar-benar melangkahkan kaki kamu di jalan takwa. Oleh karena itu, dirikanlah solat lima waktu dengan penuh rasa ketakutan dan pemusatan pikiran, seolah-olah kamu melihat Tuhan. Dan sempurnakanlah puasa-puasa kamu untuk Allah dengan penuh ketulusan. Setiap orang yang sudah layak membayar zakat, mereka hendaklah membayar zakat. Dan barangsiapa yang telah berkewajipan untuk menunaikan ibadah Haji dan tanpa ada suatu halangan, mereka hendaklah menunaikan ibadah haji.

Kerjakanlah segala amalan yang baik dengan cermat, dan hindarilah perbuatan yang buruk disertai perasaan benci. Ingatlah dengan sebenar-benarnya bahwa tidak ada suatu amalan yang boleh sampai ke hadirat Allah apabila amalan itu kosong dari

takwa. Akar setiap kebaikan adalah takwa. Sesuatu amalan yang tidak kehilangan akar ini, maka amalan itu pun tidak akan sia-sia.

Kamu juga pasti akan diuji dengan bermacam-macam kesedihan dan musibat sebagaimana ujian-ujian yang dialami oleh orang-orang mukmin zaman dahulu. Oleh karena itu, kamu hendaklah selalu berwaspada, jangan sampai kamu tergelincir. Bumi sedikit pun tidak akan dapat membinasakan kamu jika hubungan kamu dengan yang di atas langit terjalin sangat erat. Apabila suatu kemalangan menimpa diri kamu, hal itu bukanlah disebabkan oleh perbuatan musuh kamu melainkan oleh tangan kamu sendiri. Apabila kehormatan duniawi yang kamu miliki satu demi satu semakin menghilang, maka Allah akan menganugerahkan kamu kehormatan yang tidak kenal luntur di atas langit. Oleh karena itu kamu jangan pernah meninggalkan-Nya.

Kamu juga akan menghadapi kesedihan dan juga akan dikecewakan dari harapan-harapan kamu. Jadi, dalam menghadapi keadaan serupa ini kamu jangan patah semangat dan hilang arah, sebab Tuhan sedang menguji kamu, adakah langkah kamu teguh atau tidak?

Seandainya kamu mahu agar para malaikat di langit memuji kamu, maka gembiralah atas pukulan yang kamu terima, dan bersyukurlah apabila kamu mendengar caci-makian orang, dan apabila mengalami kekecewaan, jangan putus hubungan perhambaan kamu dengan Dia.

Kamu merupakan satu Jemaat Allah yang terakhir. Jadi, perhatikanlah amalan baik yang boleh mencapai darjat kesempurnaan yang tertinggi. Setiap orang di antara kamu yang menjadi malas akan dilemparkan keluar dari jemaat bagaikan satu barang yang kotor. Ia akan mati membawa penyesalan, dan dia sama sekali tidak akan dapat merugikan Allah.

Perhatikanlah! Dengan senang hati saya berikan khabar kepada kamu, bahwa Tuhan kamu benar-benar wujud. Walaupun segala sesuatu itu adalah makhluk-Nya, namun Dia memilih

mereka yang memilih-Nya. Dia sendiri akan datang kepada mereka yang pergi kepada-Nya. Barangsiapa yang menghormatinya, Dia juga akan menganugerahkan kehormatan kepadanya. Apabila kamu sudah meluruskan hati, membersihkan lidah, mata dan telinga kamu, maka datanglah kepada-Nya, Dia akan menerima kamu.

Rasulullah sallallaahu alaihi wasallam Khatamul Anbiya

Di dalam hal akidah, apa yang Tuhan kehendaki dari kamu ialah kamu beriman bahawa Tuhan itu Esa dan Nabi Muhammad sallallaahu alaihi wasallam adalah nabi-Nya, Khatamul Anbiya dan yang paling unggul. Sesudah baginda, sekarang tidak ada lagi nabi kecuali secara buruzi (bayangan) yang dipakaikan jubah **Muhammadiyahat**. Sebab seorang hamba tidak dapat berpisah dari majikannya, sama seperti dahan yang tidak terpisah dari batangnya.

Dan kamu hendaklah yakin sepenuhnya bahawa Nabi Isa Ibnu Maryam sudah wafat dan kuburannya terdapat di desa Khanyar, Srinagar, Kashmir di India. Allah Ta'ala telah memberitahu di dalam Al-Qur'an mengenai kewafatan beliau. Aku sekali-kali tidak mengingkari kemuliaan Nabi Isa alaihissalam, walaupun Tuhan mengkhabarkan bahawa Maseeh Muhammadi (Al-Maseeh yang dijanjikan untuk Nabi Muhammad) berkedudukan lebih tinggi daripada Maseeh Musawi (Al-Maseeh yang dijanjikan untuk Nabi Musa), akan tetapi aku memberi penghormatan yang sangat tinggi terhadap Maseeh (Isa) Ibnu Maryam alaihissalam, sebab dari segi kerohanian aku adalah Khatamul Khulafa di dalam Islam, seperti halnya Maseeh (Isa) Ibnu Maryam alaihissalam adalah Khatamul Khulafa di dalam kaum Israil.

Di dalam jemaat Musa alaihissalam, Isa Ibnu Maryam alaihissalam adalah Maseeh Mau'ud (Al-Maseeh yang dijanjikan) sedangkan di dalam jemaat Muhammad sallallaahu alaihi wasallam, aku adalah Maseeh Mau'ud (Al-Maseeh yang dijanjikan). Oleh karena itu aku menghormati beliau kerana persamaan ini, dan barangsiapa yang mengatakan bahwa aku tidak menghormati Maseeh (Isa) Ibnu Maryam, dia adalah seorang pembuat kerosakan dan pendusta besar.

Siapa Yang Diakui Dalam Jemaatku Dan Siapa Tidak?

Sesudah aku menerangkan perkara-perkara ini, aku sekali lagi mengatakan bahawa jangan merasa cukup lalu berkata “*kami secara zahirnya telah bai'at*”. Bai'at secara zahir itu belum memberi erti apa-apa. Tuhan melihat kepada hati kamu dan Dia akan menuntut kamu sesuai dengan keadaan hati kamu.

Perhatikanlah, dengan mengatakan hal ini aku menunaikan kewajipan tabligh, bahwa dosa itu merupakan racun, janganlah memakan racun itu. Keingkaran terhadap Tuhan adalah suatu kematian yang kotor, maka hindarilah. Berdoalah agar kamu mendapat kekuatan.

Barangsiapa yang ketika berdoa tidak meyakini bahawa Tuhan berkuasa atas segala sesuatu, sebaliknya menganggap Allah hanya sekadar berjanji, ia bukan dari golongan Jemaatku.

Barangsiapa yang tidak meninggalkan dusta dan penipuan, dia bukan dari jemaatku.

Barangsiapa yang terjat dalam ketamakan terhadap dunia dan sama sekali tidak mengarahkan pandangannya ke arah Akhirat, dia bukan dari golongan Jemaatku.

Barangsiapa yang tidak bersungguh-sungguh mengutamakan agama di atas dunia, dia bukan dari golongan Jemaatku.

Barangsiapa yang benar-benar tidak bertaubat dari setiap keburukan dan dari setiap perbuatan buruk seperti minum minuman keras, berjudi, memandang dengan pandangan berahi, khianat, memberi dan menerima rasuah, dan dari setiap perbuatan yang tidak halal, dia bukan dari golongan Jemaatku.

Barangsiapa yang mendirikan solat lima waktu dengan tidak teratur, dia bukan dari golongan Jemaatku.

Barangsiapa yang tidak tetap dalam memanjatkan doa dan tidak mengenang Tuhan dengan kerendahan hati, dia bukan dari golongan Jemaatku.

Barangsiapa yang tidak meninggalkan persahabatan buruk yang memberi pengaruh tidak baik kepadanya, dia bukan dari golongan Jemaatku.

Barangsiapa yang tidak menghormati ibu bapanya, dan tidak mentaati mereka dalam segala perkara kebaikan yang tidak bertentangan dengan Qur'an Syarif, dan lalai dalam mengkhidmati mereka, dia bukan dari golongan Jemaatku.

Barangsiapa yang tidak berlemah lembut dan berbuat baik kepada isteri dan kaum keluarganya, dia bukan dari golongan Jemaatku.

Barangsiapa yang memahrumkan (meluputkan) tetangganya dari sekecil apapun kebaikan, dia bukan dari golongan Jemaatku.

Barangsiapa yang tidak memaafkan kesalahan orang yang bersalah terhadapnya, dan dia adalah seorang pendengki, dia bukan dari golongan Jemaatku.

Setiap lelaki yang khianat terhadap isterinya dan setiap isteri yang khianat terhadap suaminya, mereka bukan dari golongan Jemaatku.

Barangsiapa yang secara jelas tidak mengakui aku sebagai Maseeh Mau'ud (Al-Maseeh yang dijanjikan) dan Mahdi Ma'hud (Mahdi yang dijanjikan), dia bukan dari jemaatku.

Barangsiapa yang tidak bersedia untuk mentaatiku dalam suatu perkara kebaikan, dia bukan dari golongan Jemaatku.

Barangsiapa yang duduk dalam kumpulan para penentang dan bersetuju dengan apa yang dikatakan oleh mereka, dia bukan dari golongan Jemaatku.

Setiap penzina, pendurhaka, pemabuk, pembunuh, pencuri, penjudi, pengkhianat, pemberi dan penerima rasuah, perampas, penganiaya, pendusta, pemalsu dan rakan subahat mereka, dan orang yang melemparkan tuduhan terhadap saudara lelaki dan perempuannya, yang tidak bertaubat dari perbuatan-perbuatan buruknya, yang tidak meninggalkan majlis-majlis yang merosakkan, mereka semua itu bukan dari golongan Jemaatku.

Semua sifat itu adalah racun. Jika kamu memakan racun-racun itu, dengan cara apapun kamu tidak akan selamat. Cahaya dan kegelapan tidak dapat berkumpul bersama-sama pada satu tempat. Barangsiapa yang berwatak serong dan tidak jujur dalam perhubungannya dengan Tuhan, dia tidak akan mendapat berkat seperti yang diperolehi oleh mereka yang berhati bersih.

Alangkah beruntungnya orang-orang yang membersihkan dan mensucikan hatinya dari segala kekotoran, dan berjanji akan tetap setia kepada Tuhan, sebab mereka tidak akan disia-siakan. Tidak mungkin Tuhan akan membiarkan mereka kehinaan sedangkan mereka ini kepunyaan Tuhan, dan Tuhan pula adalah kepunyaan mereka. Mereka akan diselamatkan dari setiap musibat dan bencana. Sungguh bodoh musuh yang hendak berbuat aniaya terhadap mereka, sedangkan mereka berada di pangkuan Tuhan dan Tuhan pula sentiasa menolong mereka. Siapakah yang beriman kepada Tuhan? Mereka itu adalah orang-orang yang keadaannya seperti di atas.

Demikian juga adalah bodoh seorang yang biadab, yang berbuat dosa, berfitrat buruk dan sentiasa berfikir hendak mendatangkan keburukan kepada orang lain sebab dia akan dibinasakan. Semenjak Tuhan menciptakan langit dan bumi, belum pernah terjadi Dia membinasakan serta memusnahkan orang-orang soleh, malah Dia memperlihatkan pekerjaan-

pekerjaan yang agung kepada mereka, dan sekarang pun demikian juga yang terjadi.

Tuhan Memiliki Kekuatan-kekuatan Yang Luar Biasa

Tuhan itu adalah Tuhan Yang Maha Setia, dan Dia menzahirkan pekerjaan-pekerjaan luar biasa. Dunia setiap saat mahu menelan mereka, dan setiap musuh merasa geram terhadap mereka, tetapi Dia yang menjadi kawan mereka pasti akan menyelamatkan mereka dari setiap bahaya dan mengurniakan mereka kemenangan dalam setiap lapangan.

Betapa beruntungnya orang yang tidak meninggalkan Tuhan yang seperti itu. Kita beriman kepada-Nya, dan kita telah mengenal-Nya. Di seluruh dunia hanya Dia sendiri Tuhan, yang telah melimpahkan wahyu kepadaku, yang telah memperlihatkan tanda-tanda agung, yang mengutusku sebagai **Maseeh Mau'ud** (Al-Maseeh yang dijanjikan) untuk zaman ini. Tidak ada Tuhan selain Dia sama ada di langit ataupun di bumi.

Barangsiapa yang tidak beriman kepada-Nya akan terhindar dari kebaikan dan berkat. Kami telah menerima wahyu dari Tuhan laksana matahari yang berkilauan. Kami telah melihat bahawa Dia Sendiri Tuhan di seluruh dunia, tidak ada lagi Tuhan selain-Nya. Tuhan yang kami jumpai itu sungguh Perkasa dan Berdiri Sendiri. Dan alangkah agungnya kudrat-kudrat yang dimiliki oleh Tuhan yang kami lihat ini.

Sesungguhnya bagi Dia tiada sesuatu yang mustahil, kecuali apa yang bertentangan dengan Kitab-Nya dan janji-Nya. Jadi, apabila kamu berdoa, hendaknya jangan menjadi seperti ahli alamiah (naturalist) yang jahil, yang menggubah di dalam khayalan mereka hukum kudrat alam yang tidak mendapat pengesahan dari Kitab Tuhan, sebab mereka itu mardud (tertolak), yang doa-doa mereka tidak akan terkabul. Mereka itu buta, tidak

celik. Mereka itu mati, tidak hidup. Mereka mengemukakan di hadapan Tuhan suatu hukum yang mereka rancang sendiri, dan mereka membatasi kudrat-kudrat-Nya, dan menganggap Dia lemah. Jadi, mereka itu akan diperlakukan serupa dengan keadaan fikiran mereka sendiri.

Akan tetapi apabila engkau berdiri untuk memanjatkan doa, maka engkau hendaklah yakin sepenuhnya bahawa Tuhan engkau berkuasa atas setiap sesuatu, dengan itu doa-doa kamu akan dikabulkan, dan engkau akan menyaksikan keajaiban-keajaiban kudrat Ilahi yang telah kami lihat. Dan ingatlah, kesaksian kami bukanlah kisah-kisah dongeng belaka, tetapi berdasarkan kepada rukya (penglihatan).

Bagaimanakah doa seseorang ini dapat dikabulkan? Ketika dia sendiri ditimpa suatu musibah yang menurut pendapatnya bertentangan dengan undang-undang kudrat, bagaimana dia terdorong untuk berdoa kalau dia tidak percaya bahawa Tuhan berkuasa atas setiap sesuatu.

Tetapi, wahai orang-orang yang baik! Janganlah berbuat seperti itu. Tuhan engkau adalah Wujud yang telah menggantungkan segala bintang-bintang tanpa tiang, dan yang telah menjelmakan bumi dan langit dari yang tiada. Apakah kamu akan berburuk sangka ke atas-Nya bahawa Dia tidak akan berdaya memenuhi keperluan kamu? Bahkan buruk sangka engkau sendiri yang akan menjauhkan kamu dari kurnia-Nya. Dalam Wujud Tuhan kami, tidak terkira banyaknya keajaiban-keajaiban yang ada, tetapi yang dapat melihatnya hanya mereka yang menjadi milik-Nya dengan benar dan suci. Namun, bagi orang lain yang tidak beriman kepada kudrat-Nya, dan tidak jujur dan setia dalam keimanannya, Dia tidak menzahirkan keajaiban-keajaiban itu.

Sungguh malang sekali insan yang sehingga sekarang tidak mengetahui bahawa dia mempunyai satu Tuhan yang berkuasa atas segala sesuatu! Syurga kita adalah Tuhan kita, kelazatan kita yang paling tinggi terletak dalam diri Tuhan kerana kita telah

melihat-Nya, dan segala keindahan terdapat pada Wujud-Nya. Harta ini patut dimiliki walau pun harus dengan mempertaruhkan jiwa, dan permata ini patut dibeli sekali pun harus dengan melenyapkan segala wujud kita.

Wahai orang-orang yang mahrum (luput)! Bergegaslah lari menuju sumber mata air ini supaya kamu dapat minum sepuas-puasnya. Ini adalah sumber mata air kehidupan yang akan menyelamatkan kamu. Apakah gerangan yang harus aku perbuat dan bagaimanakah harus aku sampaikan berita gembira ini ke dalam hati setiap manusia? Dengan gendang apa yang harus aku palu di pasar-pasar yang menyatakan ‘*inilah Tuhan kamu*’ supaya orang-orang dapat mendengarnya? Dan dengan penawar apa yang harus aku gunakan agar telinga-telinga manusia boleh terbuka untuk mendengar?

Tuhan Adalah Penyokong Dalam Segala Pekerjaan Kita

Jika kamu benar-benar menjadi kepunyaan Tuhan, maka yakinlah bahwa Tuhan menjadi kepunyaan kamu sendiri. Ketika kamu sedang tidur, Tuhan akan berjaga untuk kamu. Ketika kamu leka terhadap musuh, Tuhan akan memperhatikan mereka dan mematahkan segala rencananya.

Kamu sampai sekarang tidak sepenuhnya mengetahui kudrat-kudrat yang Tuhan miliki. Sekiranya kamu tahu, sudah tentu tidak ada hari berlalu yang menjadikan kamu bersedih hati untuk dunia. Seseorang yang memiliki sejumlah kekayaan, adakah dia akan menangis hanya kerana kehilangan satu sen sehingga meratapinya seolah-olah mengalami satu kerugian yang sangat besar?

Kalau kamu menyedari bahawa Tuhan akan mencukupkan setiap keinginan kamu, mengapakah kamu begitu tenggelam dalam urusan duniawi? Tuhan adalah satu Khazanah yang sangat berharga, oleh sebab itu hargailah kerana Dia adalah Penolong

kamu dalam setiap langkah kamu. Hendaklah kamu ingat bahawa kamu itu tidak ada nilai langsung tanpa-Nya, segala sarana dan cara kamu juga tidak bermakna langsung.

Janganlah mengikuti kebiasaan bangsa-bangsa lain yang bergantung sepenuhnya kepada sarana-sarana dunia. Dan sebagaimana seekor ular yang memakan tanah, mereka bergantung kepada sarana tanah yang rendah sifatnya. Dan sebagaimana seekor burung helang dan anjing yang makan bangkai, mereka membenamkan gigi ke dalam bangkai yang busuk.

Mereka jauh melantun dari Tuhan, mereka menyembah manusia, mereka makan daging babi dan minuman keras diperbuat seperti minum air. Dan disebabkan mereka terlampau cenderung kepada sarana-sarana dunia, dan disebabkan tidak meminta kekuatan dari Tuhan, akhirnya mereka itu mati dan ruh langit (kerohanian) telah keluar dari dalam diri mereka laksana seekor burung merpati terbang meninggalkan sarangnya. Dalam diri mereka telah dijangkiti wabak penyakit memuja dunia yang telah menyebabkan semua anggota dalaman terpotong. Oleh karena itu takutilah wabak penyakit semacam ini.

Aku tidak melarang kamu untuk menggunakan sarana kebendaan sesuai dengan keperluan dan batasannya, apa yang aku cegah ialah kamu jangan menuruti kelakuan kaum lain yang menjadi hamba dari sarana kebendaan lalu melupakan Tuhan yang juga telah menyediakan segala sarana kebendaan itu. Jika memang benar kamu mempunyai mata, maka akan kelihatan kepada kamu bahawa hanya Tuhan yang ada, segala sesuatu yang lain tidak berharga sama sekali.

Kamu tidak dapat merentangkan tangan kamu, begitu juga tidak dapat melipatnya tanpa izin Tuhan, seorang yang mati rohaninya akan mentertawakan pernyataan ini, tetapi alangkah baiknya jika dia mati saja, itu lebih baik baginya daripada dia tertawa menghina.

Berhati-hatilah! Jangan Turuti Adat Kaum lain

Awat!!! Jangan kamu terus terpengaruh untuk mengikuti sebaik sahaja kamu melihat bangsa lain yang telah mencapai kemajuan-kemajuan dalam rencana-rencana duniawi mereka dengan berkata: “*Marilah kita ikut jejak langkah mereka*”. Dengarlah dan fahamilah bahawa mereka itu sangat terasing dan lalai dari Tuhan yang memanggil kamu untuk datang kepada-Nya.

Apalah ertinya tuhan mereka, hanya seorang insan yang lemah. Sebab itu mereka ditinggalkan dalam kelalaian. Aku tidak bermaksud mencegah kamu dari berusaha mencari dan memperoleh kebaikan-kebaikan duniawi, aku hanya berharap agar kamu jangan mengikuti cara-cara mereka yang memandang kehidupan dunia ini bagaikan kehidupan yang mutlak. Hendaknya di dalam setiap pekerjaan kamu sama ada berkenaan dengan dunia atau agama, kamu hendaklah memohon terus menerus kepada Tuhan supaya menganugerahkan kekuatan dan taufik kepada kamu, tetapi jangan hanya sekadar di bibir saja, malah kamu hendaklah benar-benar yakin bahawa setiap berkat itu turun dari langit.

Kamu hanya akan benar-benar menjadi orang bertakwa apabila kamu menjadi seperti ini iaitu dalam setiap pekerjaan dan setiap kali muncul kesulitan, sebelum kamu mengatur suatu rencana, seharusnya kamu tutup pintu bilik kamu dan rebahkan diri di istana Ilahi memohon kepada Allah: *kami menghadapi kesulitan ini, kami mohon kurniakanlah kepada kami jalan untuk menyelesaikannya*. Maka, sudah pasti Ruhul Qudus akan menolong kamu, dan Dia secara ghaib akan membukakan jalan-jalan keluar bagi kamu.

Kasihaniilah jiwa kamu, dan janganlah mengikuti mereka yang benar-benar putus hubungan dengan Tuhan, yang sepenuhnya bergantung kepada sarana kebendaan sahaja sehingga untuk memohon kekuatan dari Ilahi pun sangat sukar

mengucapkan **insyaAllah** (jika Allah menghendaki). Semoga Allah membuka mata kamu supaya kamu tahu bahwa Tuhan kamu adalah ‘penyokong’ dalam segala pekerjaan kamu. Kalau **penyokong** utama suatu bangunan jatuh, apakah penunjang-penunjang lainnya dapat bertahan? Tidak, malah akan jatuh pada masa yang sama dan dikhuatiri akan turut mengorbankan nyawa.

Demikian juga halnya dalam pekerjaan-pekerjaan kamu, ia tidak akan berkekal tanpa pertolongan Ilahi. Jika kamu tidak jadikan pegangan untuk meminta pertolongan dan kekuatan dari-Nya, maka kamu tidak akan memperoleh kejayaan, dan kesudahannya kamu akan mati dengan membawa penyesalan yang sangat besar.

Janganlah kamu asyik memikirkan bagaimana kaum-kaum yang lain boleh mencapai kemajuan padahal mereka itu tidak tahu menahu tentang Tuhan kamu yang Sempurna dan Berkuasa. Jawabannya; *disebabkan mereka telah meninggalkan Tuhan, maka mereka telah dihadapkan kepada ujian keduniaan.*

Kadangkala ujian dari Tuhan itu terjadi dalam keadaan seperti ini, iaitu orang yang meninggalkan Tuhan dan hati mereka mabuk pada kelazatan dan keseronokan dunia, serta mendambakan kemewahan dunia, maka pintu keduniaan dibukakan kepadanya, tetapi dari segi agama orang itu miskin dan kosong belaka. Akhirnya dia mati dalam khayalan-khayalan duniawi dan dimasukkan ke dalam kancah api jahannam yang abadi¹.

Selain itu, ujian juga terjadi seperti ini, iaitu ada seseorang yang tidak berapa berhasil dalam soal keduniaan. Tetapi pada hujungnya, ujian seperti ini tidak seberapa berbahaya dibandingkan dengan ujian jenis yang pertama, sebab ujian yang

¹ Sebagaimana yang telah Hazrat Maseeh Mau’ud alaihissalam jelaskan di tempat lain bahawa perkataan ‘abadi di sini berarti jangka waktu yang lama sekali (*Penyusun*)

pertama itu menimbulkan perasaan sombong. Walau bagaimanapun, kedua-dua corak manusia ini adalah **مَعْتُوبٌ عَلَيْهِمْ**, yakni tergolong dalam orang yang **dimurkai** Tuhan.

Sumber kesejahteraan yang sebenar adalah Tuhan. Jadi, apabila orang-orang ini tidak mengetahui tentang Tuhan Hayyu wa Qayyum (yang Maha Hidup dan Maha Berdiri Sendiri), malah mereka tidak ambil peduli dan berpaling daripada-Nya, maka bagaimanakah kesejahteraan yang hakiki akan sampai kepada mereka? Mubarak (berbahagialah) atas orang yang mengerti akan rahsia ini, dan sebaliknya binasalah orang yang tidak mengerti akan rahsia ini.

Demikian juga kamu hendaklah jangan mengikuti jejak langkah ahli falsafah dunia ini, dan jangan hendaknya melihat mereka dengan penuh penghormatan. Semua ini hanya kebodohan belaka. Falsafah yang sejati ialah apa yang Tuhan telah ajarkan kepada kamu dalam Al-Qur'an.

Binasalah orang-orang yang gila dengan falsafah duniawi, dan berbahagialah orang-orang yang mencari ilmu dan falsafah sejati di dalam Kitab Allah. Mengapakah kamu mengikuti jejak orang-orang yang bodoh? Adakah kamu hendak mengajarkan kepada Tuhan suatu perkara yang Dia tidak ketahui? Apakah kamu hendak berlari-lari di belakang orang buta, dengan harapan supaya dia menunjukkan jalan bagi kamu?

Wahai orang yang bodoh! Bagaimana orang yang sendiri buta dapat menunjukkan jalan kepada kamu? Sesungguhnya falsafah yang sejati itu diperolehi hanya melalui Ruhul Qudus yang telah dijanjikan kepada kamu. Dengan perantaraan Ruhul Qudus itu kamu akan dapat menjangkau ilmu-ilmu yang suci, yang tidak dapat dicapai oleh orang lain.

Kalau kamu mohon dengan kejujuran, sudah pasti kamu akan memperolehinya, kemudian kamu akan menyedari bahawa inilah

ilmu yang memberikan kesegaran dan kehidupan kepada hati dan boleh menyampaikan kamu ke mercu keyakinan yang sempurna.

Orang yang suka makan bangkai, bagaimana dia akan dapat memberikan makanan yang bersih? Orang yang sendiri buta, bagaimana dia akan dapat memperlihatkan suatu jalan? Segala sesuatu hikmah yang suci datangnya dari langit. Jadi, apakah yang dapat kamu cari dari orang-orang bumi?

Orang-orang yang mewarisi hikmah itu ialah mereka yang ruhnya menuju ke arah langit. Orang yang sendiri tidak merasa tenteram, bagaimanakah mereka dapat memberikan ketenteraman kepada kamu? Akan tetapi, pertama sekali diperlukan ialah kesucian hati, pertama sekali diperlukan ialah kelurusan dan kebersihan, kemudian sesudah itu kamu akan memperoleh semua ini.

Pintu Wahyu Sekarang Pun Masih Terbuka

Jangan hendaknya kamu berfikir bahawa wahyu Ilahi itu tidak ada lagi di masa mendatang dan ia telah ketinggalan di belakang. Dan juga jangan menganggap Ruhul Qudus tidak lagi dapat turun waktu sekarang dan ia telah datang zaman sebelumnya. Aku berkata dengan sebenar-benarnya bahawa segala pintu boleh tertutup, akan tetapi pintu untuk turunnya Ruhul Qudus tidak pernah tertutup. Bukalah selebar-lebarnya pintu-pintu hati nurani kamu supaya ia dapat masuk. Kamu meletakkan diri kamu jauh dari sinaran matahari ini, tambahan lagi jendela untuk laluan masuk pun kamu tutup.

Wahai orang dungu, bangkitlah dan bukalah jendela agar matahari dengan sendirinya akan menyelinap masuk ke dalam kalbu kamu. Tambahan pula pada zaman ini Tuhan tidak menutup bagi kamu jalan-jalan kurnia di dunia, malah Dia melipatgandakan-Nya. Adakah pada sangkaan kamu Dia telah menutup

untuk kamu pintu-pintu kurnia langit yang sangat kamu perlukan pada saat ini?

Sudah tentu tidak, malah Dia telah membuka pintu itu selebar-lebarnya. Kini, jika Tuhan membuka pintu nikmat-nikmat yang terdahulu untuk kamu, sesuai dengan ajaran-Nya seperti yang diajarkan dalam surah **Al-Fatihah**, maka mengapakah kamu menolak untuk mengambilnya? Jadilah kamu orang yang dahaga akan sumber mata air itu supaya air akan mengalir keluar. Kamu harus mula menangis seperti bayi yang meminta susu supaya air susu ibu keluar dengan sendirinya. Jadikanlah diri kamu layak dikasihi supaya kamu dikasihi. Tunjukkan kegelisahan supaya kamu memperoleh ketenteraman hati. Merataplah berkali-kali sehingga ada tangan memimpin kamu. Betapa bahayanya jalan menuju Tuhan itu, namun ia dipermudahkan bagi mereka yang sanggup melompat ke dalam jurang yang dalam dengan niat untuk mati.

Mubarak (tahniah) atas mereka yang berperang melawan nafsu mereka untuk Tuhan, dan malang sekali nasib mereka yang sanggup berperang dengan Tuhan demi untuk nafsunya dan tidak mengikuti kehendak-Nya. Barangsiapa mengabaikan hukum Tuhan untuk mengikuti nafsunya tidak akan masuk ke dalam langit (syurga). Jadi, berusaha agar satu titik atau satu kata pun dari Qur'an Syarif tidak menjadi saksi terhadap kamu sehingga kamu kedapatan berbuat salah. Sebab, sesungguhnya keburukan akan mendapat hukuman walaupun sebesar zarah.

Waktu sangatlah singkat, sedangkan tugas hidup masih belum lagi selesai. Percepatkanlah langkah kaki, perhatikan selalu waktu malam yang hampir tiba dan kemungkinan-kemungkinan yang boleh terjadi. Jangan sampai ada sesuatu yang tertinggal dan menyebabkan kerugian, atau jangan sampai semua benda tidak lagi berguna dan tidak layak dipersembahkan di istana Raja.

Kedudukan Al-Qur'an Yang Tinggi

Aku mendengar bahawa beberapa orang di antara kamu ada yang sama sekali menolak hadis. Jika hal itu benar maka mereka itu sangat keliru. Aku tidak mengajarkan yang demikian, malah aku mengajarkan bahawa untuk memberi petunjuk kepada kamu, Tuhan telah memberikan kepada kamu:-

(1) Pertama sekali ialah Al-Qur'an yang mengutarakan Keesaan, Kegagahan, dan Keagungan Tuhan di dalamnya, dan juga memutuskan masalah pertentangan pendapat yang ada di kalangan Yahudi dan Nasrani.

Demikian juga Qur'an Syarif melarang kamu agar jangan memuja apa pun selain Allah, baik berupa benda, manusia, haiwan, matahari, bulan, dan bintang-bintang lain atau pun diri sendiri. Karena itu berhati-hatilah, jangan biarkan kaki berjalan walau selangkah pun ke arah perkara yang bertentangan dengan ajaran Tuhan dan petunjuk Qur'an Syarif. Aku berkata dengan sebenar-benarnya kepada kamu bahawa barangsiapa yang mengabaikan walaupun satu daripada 700 hukum Ilahi di dalam Al-Qur'an, itu bererti dia telah menutup pintu keselamatan baginya dengan tangan sendiri.

Jalan keselamatan yang hakiki telah dibuka oleh Qur'an Syarif sahaja, sedangkan yang lain semuanya itu hanya bayangan semata-mata. Oleh kerana itu, pelajarilah Al-Qur'an Syarif dengan pemikiran yang mendalam, dan cintailah ia dengan kecintaan yang tidak pernah kamu berikan kepada sesiapa pun

kerana, sebagaimana Tuhan berfirman kepadaku **الْخَيْرُ كُلُّهُ فِي الْقُرْآنِ**, yakni segala kebaikan-kebaikan terletak di dalam Al-Quran, hal itu memang benar. Sayang sekali orang-orang yang lebih mengutamakan barang lain di atasnya.

Sumber segala kejayaan dan keselamatan kamu terletak di dalam Al-Qur'an Syarif. Tidak satu pun dari keperluan-keperluan rohani bagi kamu yang tidak terdapat di dalam Al-Qur'an Syarif. Pada Hari Kiamat, Al-Qur'an yang akan menjadi saksi sama ada keimanan kamu benar atau dusta. Dan selain Al-Qur'an, tidak ada satu kitab pun di bawah kolong langit yang dapat memberikan petunjuk secara langsung. Tuhan telah berlaku sangat baik kepada kamu kerana menganugerahkan sebuah kitab seperti Al-Qur'an ini.

Aku berkata dengan sebenar-benarnya kepada kamu bahawa Kitab yang telah dibacakan kepada kamu, seandainya ia dibacakan kepada orang Kristian, sudah pasti mereka tidak akan binasa. Nikmat dan petunjuk yang diberikan kepada kamu ini, jika ia diberikan kepada kaum Yahudi menggantikan Taurat, maka banyak dari firqah-firqah mereka yang tidak akan memungkirkan Hari Kiamat. Jadi, hargailah nikmat yang dilimpahkan kepada kamu ini. Nikmat ini sangat berharga sekali. Jika Al-Qur'an tidak diturunkan, maka dunia ini hanya kelihatan seperti segumpal daging yang menjijikkan. Sesungguhnya Al-Qur'an Syarif adalah satu kitab yang tidak ada tandingannya dalam soal memberi hidayat.

Al-Qur'an boleh menjadikan seseorang itu suci dalam masa seminggu jika dia tidak berpaling secara zahir mahupun batin. Al-Qur'an Syarif boleh menjadikan kamu seperti para nabi jika kamu tidak lari daripadanya. Selain Al-Qur'an Syarif, kitab mana lagi yang mengajarkan doa sejak awal lagi kepada pembacanya dan diberikan harapan seperti dalam ayat **إِهْدِنَا الصِّرَاطَ الْمُسْتَقِيمَ** **صِرَاطَ الَّذِينَ أَنْعَمْتَ عَلَيْهِمْ** yakni "Tunjukilah kami pada jalan yang lurus, (iaitu) jalan orang-orang yang telah Engkau beri nikmat atas mereka". (Al-Fatihah:6,7)

Yakni, tunjukkanlah kepada kami jalan-jalan nikmat yang telah diperlihatkan kepada orang-orang dahulu iaitu nabi, rasul,

siddiq, syahid, dan soleh. Oleh karena itu, tingkatkan keberanian kamu dan jangan menolak seruan Al-Qur'an Syarif, bahawa Dia bukan hanya hendak memberikan nikmat-nikmat seperti yang diberikan kepada orang dahulu, malah Tuhan beriradah untuk memberikan lebih banyak nikmat lagi kepada kamu.

Tuhan telah menciptakan kamu untuk menjadi pewaris dalam menerima kekayaan rohani dan jasmani, dan sampai Hari Kiamat kekayaan-kekayaan tersebut tidak akan diwariskan kepada orang lain.

Tuhan sekali-kali tidak akan memahrumkan (meluputkan) kamu dari nikmat wahyu, ilham, mukalimah (berkata-kata) dan mukhatibah (berkata-kata). Dia akan menyempurnakan terhadap kamu semua nikmat-nikmat yang telah diberikan kepada orang-orang yang dahulu itu. Akan tetapi barangsiapa yang berdusta atas nama Tuhan dengan cara yang salah dan mengatakan bahawa wahyu Ilahi telah turun kepadanya padahal tidak demikian, atau mengatakan bahawa ia telah mendapat kemuliaan bermukalimah (berkata-kata) dan bermukhatibah (berkata-kata) padahal tidak demikian, maka dengan bersaksikan Allah dan para malaikat-Nya aku berkata bahawa orang itu akan binasa, sebab dia telah berdusta dan menipu atas nama Khaliq-Nya (pencipta-Nya).

Kedudukan Penjelasan Sunnah

(2) Petunjuk yang kedua bagi kaum Muslimin ialah Sunnah, yaitu segala amal (perbuatan) Rasulullah sallallaahu alaihi wasallam yang diperlihatkan sebagai penjelasan dari hukum-hukum (peraturan) Qur'an Syarif. Sebagai contoh, walaupun secara zahir Al-Qur'an tidak menjelaskan tentang jumlah rakaat dalam tiap-tiap solat fardu lima waktu, iaitu berapa rakaat dalam solat Subuh dan solat-solat yang lain, akan tetapi Sunnah Rasulullah sallallaahu alaihi wasallam membuat semuanya menjadi jelas.

Janganlah keliru dengan mengatakan bahawa Sunnah dan hadis itu sama, sebab hadis dikumpulkan sesudah 100-150 tahun kemudian, sedangkan Sunnah itu wujud bersamaan dengan Qur'an Syarif. Selepas Al-Qur'an, Sunnah menempati tempat kedua terbesar dalam ihsan Tuhan kepada manusia. Kewajipan Tuhan dan Rasulullah sallallaahu alaihi wasallam hanya ada dua perkara iaitu Tuhan menurunkan Al-Qur'an kepada makhluk-makhluk-Nya melalui firman dan baginda memberitahu sesuai dengan kehendak-Nya.

Inilah tanggungjawab undang-undang Tuhan. Manakala Rasulullah sallallaahu alaihi wasallam pula bertanggungjawab memperlihatkan kalam (firman) Tuhan secara amalan dan memberi kefahaman yang sebenar kepada manusia. Jadi, Rasulullah sallallaahu alaihi wasallam memperlihatkan firman dalam bentuk amalan dengan begitu indah, dan dengan amalan yakni sunnah baginda, segala kesulitan manusia dapat diselesaikan.

Adalah tidak tepat jika mengatakan bahawa menyelesaikan masalah bergantung kepada hadis kerana sebelum wujudnya hadis, **Islam** telah berdiri di muka bumi. Adakah boleh kita katakan bahawa selagi hadis belum wujud, orang Islam tidak mengerjakan solat atau membayar zakat, atau tidak mengerjakan haji, ataupun mereka tidak mengenal halal dan haram?

Kedudukan Hadis Sebagai Penyokong

(3) Petunjuk jalan yang ketiga tentu saja Hadis, sebab hadis telah menjelaskan berbagai masalah mengenai Sejarah Islam, keadaan akhlak dan permasalahan Fiqah. Dan faedah daripada Hadis yang sangat besar ialah hadis menjadi pengkhidmat kepada Al-Qur'an dan juga Sunnah.

Jika ada orang yang tidak diberikan pengetahuan tentang Al-Qur'an, maka dalam keadaan ini hadis menjadi pemutus kepada

Al-Qur'an sebagaimana Yahudi memperkatakan mengenai hadis-hadis mereka, tetapi kita menyatakan bahwa hadis adalah pengkhidmat kepada Al-Qur'an dan Sunnah, dan memang jelas bahwa keugungan tuan lebih terserlah dengan adanya orang suruhan. Al-Qur'an adalah firman Tuhan dan Sunnah adalah amal (perbuatan) Rasulullah sallallaahu alaihi wasallam, dan hadis merupakan saksi penyokong kepada Sunnah. Na'uzubillah, adalah salah jika mengatakan bahwa Hadis menjadi hakim atas Al-Qur'an.

Jika memang Al-Qur'an perlu kepada hakim, maka hakim itu adalah Al-Qur'an sendiri. Hadis yang menempati kedudukan 'mengagak atau menjangka' sama sekali tidak boleh menjadi hakim, ia hanya boleh berfungsi sebagai penguat bukti atau keterangan. Qur'an Syarif dan Sunnah telah melakukan semua tugasnya yang sebenar, dan hadis hanya menyokong dalil, bagaimana hadis boleh menjadi hakim atas Al-Qur'an?

Al-Qur'an dan Sunnah memberi hidayat (bimbingan) pada zaman itu, sedangkan hadis yang diperkatakan belum pun ada nama dan tanda-tandanya.

Jadi, jangan mengatakan hadis menjadi hakim atas Qur'an, sebaliknya katakanlah bahawa hadis adalah penyokong kepada Qur'an dan Sunnah.

Ringkasnya, Sunnah menzahirkan keinginan Al-Qur'an. Sunnah bermaksud jalan yang telah diletakkan oleh Rasulullah sallallaahu alaihi wasallam secara amalan atas para sahabat. Sunnah bukanlah suatu hal yang ditulis dalam kitab-kitab 100 atau 150 tahun kemudian, tetapi yang sedemikian itu adalah Hadis. Dan Sunnah bermaksud keadaan amalan yang baik, yang ditanamkan dalam diri ribuan umat Islam sejak awal-awal lagi. Walaupun kebanyakan Hadis bermartabat spekulasi (mengagak atau menjangka) ia juga boleh diterima jika suatu perkara tidak bertentangan dengan Qur'an Syarif dan Sunnah, dan tetap

menunjang Qur'an Syarif dan Sunnah, serta di dalamnya terdapat khazanah yang banyak mengenai masalah-masalah Islamiah.

Jadi, perbuatan tidak menghargai hadis menandakan seolah-olah memotong salah satu anggota badan Islam. Tetapi, jika ada sebuah hadis yang bertentangan dengan Al-Qur'an dan Sunnah, juga bertentangan dengan hadis lain yang sesuai dengan Al-Qur'an, atau misalnya ada hadis yang bertentangan dengan **Sahih Bukhari**, maka hadis tersebut tidak patut diterima, sebab kalau hadis tersebut diterima, itu berarti menolak Qur'an Syarif dan menolak semua hadis-hadis yang sesuai dengan Qur'an Syarif.

Aku maklum, bahawa tidak ada seorang pun dari antara orang-orang yang bertakwa akan berani mempercayai hadis semacam itu, yang bertentangan dengan Al-Qur'an, Sunnah dan hadis-hadis lain yang sesuai dengan Al-Qur'an.

Walaupun bagaimanapun, hargailah hadis dan ambillah faedah daripadanya, sebab sumbernya berasal dari Rasulullah sallallahu alaihi wasallam, dan selagi Qur'an Syarif dan Sunnah tidak mendustakannya kamu juga tidak harus mendustakannya, malah kamu harus disiplin bahawa tidak ada gerak dan diam kamu dalam suatu perkara, atau kamu melakukan dan tidak melakukan sesuatu kecuali kamu mempunyai hadis yang menyokong perbuatan kamu.

Tetapi, jika:-

- (1) Ada suatu hadis yang memang jelas bertentangan dengan penjelasan Al-Qur'an, maka kamu hendaklah risau untuk mengikuti hadis itu, mungkin kamu di pihak yang salah. Dan jika bantahan itu belum selesai, maka hadis itu hendaklah disingkirkan kerana ia bukan dari Rasulullah sallallahu alaihi wasallam.
- (2) Dan jika ada suatu hadis itu lemah, tetapi Al-Qur'an sesuai dengannya, maka terimalah hadis itu kerana Al-Qur'an mengakui kebenarannya.

- (3) Jika ada suatu hadis yang menyentuh tentang suatu khabar ghaib, tetapi di sisi para Muhaddis ia adalah lemah, dan pada zaman kamu atau zaman sebelumnya ia telah terjadi dengan nyata, maka akuilah kebenaran hadis itu dan anggaplah muhaddis itu silap dan pendusta kerana menganggap hadis itu lemah dan palsu. Banyak hadis seperti itu yang mengandungi khabar ghaib, dan di kalangan para muhaddis pula ia dianggap majruh (tidak sempurna), maudhu' (dibuat-buat) atau dho'if (lemah).

Jadi, jika di antara hadis-hadis itu terjadi dengan nyata dan kamu mengatakan “*tinggalkan dan kami tidak mahu terima kerana ini hadis dho'if atau perawinya tidak boleh dipercayai*”, maka dalam keadaan itu kamu sendiri yang tidak beriman kerana menolak hadis yang telah terjadi dengan nyata sekali.

Cuba bayangkan jika terdapat ribuan hadis seperti itu dan di sisi para Muhaddis semuanya dho'if, sedangkan ribuan khabar ghaib itu terjadi dengan nyata, adakah kamu juga akan mengatakannya sebagai dho'if lalu menafikan ribuan tanda atau bukti mengenai Islam. Jika kamu berbuat demikian, maka kamu boleh dianggap sebagai musuh Islam. Allah Ta'ala berfirman: **فَلَا يُظْهِرُ عَلَىٰ غَيْبِهِ أَحَدًا إِلَّا مَنِ ارْتَضَىٰ مِنْ رَسُولٍ** yakni “Dia tidak akan menzahirkan khabar ghaib-Nya kepada sesiapa pun kecuali kepada Rasul yang Dia redhai.”

Jadi, khabar ghaib ini perlu diberikan kepada siapa jika bukan kepada rasul yang sebenar? Adakah dalam keadaan seperti ini bukan satu bentuk keimanan bahawa suatu hadis yang dianggap dho'if adalah salah para muhaddis? Atau kita terpaksa mengatakan bahawa Tuhan telah salah kerana membenarkan suatu hadis yang dianggap dho'if?

- (4) Jika ada hadis yang dianggap dho'if, dan ia tidak bertentangan dengan Al-Qur'an dan Sunnah, malah ia sejalan dengan ajaran Al-Qur'an, maka hadis itu boleh diguna pakai.

Akan tetapi hendaknya kamu berhati-hati dalam mengikuti hadis-hadis tersebut, sebab ada banyak hadis-hadis yang maudhu' (dibuat-dibuat) yang telah mendatangkan fitnah ke dalam agama Islam. Setiap firqah berpegang kepada hadis yang sesuai dengan akidah masing-masing, sehingga dalam hal solat yang begitu jelas dan mutawatir (tetap) pun, dengan adanya hadis-hadis berkenaan menyebabkan timbul pelbagai cara melaksanakan solat.

Ada yang menyebut lafaz 'amin' dengan suara nyaring, ada juga yang mengucapkannya perlahan. Ada yang membaca Fatihah di belakang imam, ada pula yang menganggapnya boleh merosakkan solat. Ada yang melipat kedua tangannya di atas dada sedangkan yang lainnya meletakkan di atas pusat. Penyebab dari perbezaan ini sesungguhnya berpunca dari hadis-hadis, firman Allah: **كُلُّ حِزْبٍ بِمَا لَدَيْهِمْ فَرِحُونَ** yakni "Tiap-tiap golongan bergembira dengan apa yang ada pada mereka". (Ar-Rum:33)

Keyakinan Sempurna Cara Menyelamatkan Diri Dari Dosa

Wahai hamba pencari Tuhan! Bukalah telinga dan dengarkanlah bahawa sesungguhnya keyakinan itu adalah sesuatu yang luar biasa. Keyakinan boleh melepaskan kamu dari cengkaman dosa. Keyakinan itu boleh memberikan kekuatan untuk melakukan kebaikan. Keyakinan itu boleh menjadikan kamu seorang asyik yang sejati kepada Tuhan.

Adakah kamu boleh terselamat dari dosa tanpa keyakinan? Adakah kamu dapat mengawal hawa nafsu tanpa penzahiran keyakinan? Adakah kamu dapat memperolehi suatu ketenteraman

tanpa keyakinan? Adakah kamu dapat membuat perubahan yang sejati dalam diri kamu tanpa keyakinan? Dapatkah kamu memperoleh suatu kebahagiaan yang hakiki tanpa keyakinan? Adakah di bawah langit ini suatu kaffarah (penebusan) atau bayaran fidyah yang dapat menghindarkan kamu dari dosa? Dapatkah darah Nabi Isa ibnu Maryam melepaskan kamu dari dosa-dosa menggunakan darahnya?

Wahai orang-orang Kristian, janganlah berdusta semacam ini, yang boleh menghancurkan seluruh bumi ini. Nabi Isa sendiri memerlukan keyakinan untuk keselamatan dirinya, beliau telah yakin dan mendapat keselamatan. Alangkah sedihnya orang-orang Kristian yang menipu orang ramai dengan mengatakan bahawa mereka telah selamat dari dosa-dosa berkat darah Nabi Isa, padahal dari kepala sehingga kaki, mereka tenggelam dalam dosa-dosa.

Mereka tidak tahu sama sekali siapa sebenarnya Tuhan mereka, malah kehidupan mereka penuh dengan kelalaian. Dalam kepala mereka hanya seronok dengan minuman keras. Akan tetapi mereka langsung tidak tahu keseronokan sebenar yang turun dari langit. Dan mereka tidak mendapat nasib untuk memperolehi kehidupan yang direstui oleh Tuhan dan juga kesan daripada kehidupan yang suci.

Oleh karena itu ingatlah sebaik-baiknya, bahawa tanpa keyakinan yang sempurna kamu tidak akan dapat keluar dari kehidupan yang gelap gelita dan juga kamu tidak akan mendapat Ruhul Qudus. Berbahagialah mereka yang mempunyai keyakinan kerana mereka akan melihat Tuhan. Berbahagialah juga mereka yang telah selamat dari waswas dan keraguan kerana mereka itulah yang akan selamat dari dosa. Berbahagia jugalah kamu yang apabila diberikan khazanah keyakinan, dosa-dosa kamu pun hilang selepas itu.

Dosa dan yakin tidak dapat berkumpul bersama. Adakah kamu akan memasukkan tangan kamu ke dalam sebuah lubang

jika di dalam lubang itu kamu lihat sendiri ada seekor ular yang amat berbisa? Adakah kamu tetap berdiri di suatu tempat di mana batu-batu berjatuh dari gunung berapi? Atau tempat itu menjadi sasaran petir yang menyerbu dari langit, atau tempat serangan singa yang buas? Atau adakah kamu akan terus tinggal di tempat jangkitan taun berbahaya yang boleh menghapuskan keturunan insan? Jadi, jika kamu mempunyai keyakinan sebegitu rupa sebagaimana keyakinan kamu ke atas ular, singa, petir dan taun tersebut, sudah pasti kamu tidak akan berani melakukan sesuatu yang boleh mengundang hukuman Tuhan, ataupun kamu tidak akan berani memisahkan diri dari kejujuran dan kesetiaan kepada Tuhan.

Wahai sekalian manusia yang dipanggil kepada kebaikan dan kebenaran, peganglah keyakinan itu dengan bersungguh-sungguh, bahawa tarikan terhadap Tuhan akan muncul dalam diri kamu dan kamu akan dibersihkan dari bintik kotoran dosa apabila hati kamu telah dipenuhi dengan keyakinan.

Mungkin kamu akan berkata bahawa kamu sudah memiliki keyakinan itu. Jadi, ingatlah bahawa kamu sedang tertipu. Keyakinan sama sekali belum kamu miliki kerana kamu belum memperolehi apa yang sepatutnya. Puncanya ialah kamu tidak menghindarkan diri dari dosa. Kamu juga belum lagi melangkah kaki sebagaimana yang seharusnya. Kamu juga tidak takut sebagaimana yang seharusnya.

Cubalah kamu fikirkan sendiri, orang yang merasa yakin bahawa di dalam sebuah lubang tertentu ada seekor ular, beranikah dia memasukkan tangannya ke dalam lubang tersebut? Orang yang merasa yakin bahawa di dalam makanannya terdapat racun, adakah dia berani memakan makanan itu? Demikian juga orang yang melihat dengan matanya sendiri bahawa di dalam sebuah hutan belantara tertentu hidup ratusan singa yang buas, adakah dia berani memasuki hutan itu tanpa berhati-hati?

Justeru itu, bagaimanakah tangan kamu, kaki kamu, telinga kamu dan mata kamu berani melakukan suatu dosa jika kamu mempunyai keyakinan sepenuhnya akan hari pembalasan daripada Tuhan? Dosa tidak akan dapat mengatasi keyakinan. Dan apabila kamu melihat api yang berkobar-kobar sedangkan kamu tahu bahwa api itu dapat menghanguskan dan meleburkan setiap benda menjadi abu, adakah kamu berani memasukkan diri ke dalamnya? Dan tembok keyakinan itu tinggi mencapai langit, syaitan tidak dapat memanjatnya.

Setiap orang yang telah suci, dia suci disebabkan keyakinan. Keyakinan juga memberi kekuatan untuk menanggung kesulitan sehingga memungkinkan seorang raja turun takhta untuk menjalani kehidupan sebagai orang faqir. Keyakinan mempermudah segala kesukaran. Keyakinan memungkinkan manusia untuk melihat Tuhan. Segala persoalan mengenai kaffarah (penebusan dosa) adalah palsu dan setiap fidyah (bayaran denda) adalah batil, dan setiap kesucian datang menjelma dari jalan keyakinan.

Satu benda yang dapat melepaskan manusia dari dosa dan menyampaikan manusia kepada Tuhan ialah keyakinan. Dan dalam soal kejujuran dan keteguhan, manusia boleh mengatasi kedudukan malaikat juga melalui keyakinan. Semua mazhab (agama) yang tidak dapat mempersembahkan sarana keyakinan adalah mazhab palsu. Semua agama yang tidak dapat memperlihatkan Tuhan melalui keyakinan adalah agama palsu. Semua agama yang hanya mengajarkan kisah-kisah dongeng dan hikayat-hikayat lama juga adalah palsu.

Jangan Gembira Atas Kisah-kisah

Sekarang ini Tuhan tetap sama seperti dahulu. Sekarang pun Kudrat-Nya masih tetap berlaku sama seperti dahulu. Sebagaimana dahulu Dia berkuasa memperlihatkan tanda-tanda,

sekarang pun tetap memperlihatkan tanda-tanda-Nya. Oleh karena itu, mengapakah kamu merasa gembira atau puas hati hanya dengan mendengar kisah-kisah sahaja? Agama itu adalah agama yang sudah rosak jika mukjizatnya tinggal kisah-kisah sahaja, khabar ghaibnya juga tinggal kisah semata-mata. Suatu jemaat dianggap sudah rosak sekiranya Tuhan tidak lagi turun atas mereka dan tetap tidak suci melalui keyakinan dan tangan Tuhan.

Sebagaimana seorang insan yang tertarik apabila melihat sarana kelazatan dirinya, demikian juga mereka boleh mendapatkan kelazatan rohani melalui keyakinan sehingga tertarik kepada Tuhan. Dan kecantikannya dibuat begitu indah sehingga semua benda lain kelihatan tidak berharga dan harus ditolak.

Manusia benar-benar akan bebas dari dosa hanya apabila mengetahui dengan penuh keyakinan tentang kekuasaan Tuhan dan adanya hari pembalasan dari Tuhan. Kejahilan atau ketidaktahuan itu akar dari kelancangan dan keberanian untuk berbuat dosa. Orang yang mengambil suatu bahagian dari makrifat Ilahi, dia tidak akan bertindak lancang.

Apabila seorang pemilik rumah mengetahui bahawa banjir besar sedang menuju ke rumahnya atau di sekitar rumahnya api sedang menyala-nyala dan tinggal sedikit masa lagi akan membakar rumahnya, maka dia tidak akan tinggal di dalam rumahnya.

Jadi, seandainya kamu mengatakan bahawa kamu yakin akan kewujudan hari pembalasan daripada Tuhan, maka bagaimanakah kamu berani tetap dalam keadaan kamu yang berbahaya itu? Oleh itu, bukalah mata kamu, dan lihatlah hukum Tuhan yang terdapat di seluruh dunia. Janganlah jadi seperti seekor tikus yang keinginannya selalu menyorok ke bawah, malah jadilah kamu burung merpati yang gemar melayang-layang terbang bebas di angkasa.

Sesudah kamu bai'at dengan niat untuk bertaubat, janganlah kembali melakukan dosa. Janganlah kamu menjadi seperti seekor ular yang tetap masih seekor ular walaupun telah berganti kulit. Ingatah selalu akan maut (kematian) bahawa ia semakin menghampiri kamu, dan kamu tidak menyedarinya. Berusahalah untuk menjadi suci sebab manusia memperoleh kesucian jiwa hanya apabila dia sendiri menjadi suci.

Memperoleh Kesucian Melalui Solat

Tetapi, bagaimanakah kamu memperoleh nikmat itu? Soal ini dijawab sendiri oleh Allah Ta'ala di dalam Qur'an Syarif bahawa **وَاسْتَعِينُوا بِالصَّبْرِ وَالصَّلَاةِ**, yakni “mintalah pertolongan dari Tuhan dengan sabar dan solat” (Al-Baqarah:154). Apakah yang dimaksudkan dengan solat? Solat adalah doa yang dipohon dengan penuh kerendahan hati daripada Allah Ta'ala disertai dengan tasbih (penyucian), tahmid (pujian) takdis (mensucikan), istighfar dan salawat.

Jadi, apabila kamu mendirikan solat, janganlah menjadi seperti orang yang tidak tahu apa-apa kerana cuma berdoa dalam bahasa Arab, ini kerana solat dan istighfarnya hanya pameran belaka yang tidak akan hakikatnya. Tetapi, selain daripada ayat-ayat Al-Qur'an yang merupakan Kalam Tuhan, dan selain daripada doa-doa yang biasa dibaca oleh Rasulullah sallallahu alaihi wasallam, maka bacalah juga doa-doa dalam bahasa sendiri dengan penuh kerendahan hati supaya memberi pengaruh ke atas hati kamu. Di dalam solat ada penawar terhadap kesulitan-kesulitan yang akan datang. Kamu tidak tahu bahawa keesokan hari, bagaimana qada' dan qadar yang akan berlaku kepada kamu.

Jadi, sebelum matahari terbit, maka mohonlah kepada Tuhan dengan penuh kerendahan hati supaya hari itu membawa kebaikan dan berkat atas kamu.

Wahai Orang Kaya Dan Orang Berharta

Hai para hartawan, para raja, dan para jutawan! Di antara kamu sekalian sangat sedikit sekali yang takut kepada Allah dan berjalan di atas semua jalan-Nya. Kebanyakan dari mereka tertarik oleh kemewahan dunia dan kemudian mereka menghabiskan usia mereka di dalamnya sehingga langsung tidak ingat akan kematian.

Setiap orang kaya yang tidak menunaikan solat dan mengabaikan Tuhan akan menanggung dosa semua para pekerjanya. Setiap hartawan yang minum minuman keras akan menanggung dosa orang-orang bawahannya yang ikut serta menikmati minuman keras itu.

Wahai orang-orang yang bijaksana! Dunia ini bukan tempat yang kekal. Kawal diri kamu. Tinggalkan segala tindakan yang berlebih-lebihan. Hindarilah semua barang yang memabukkan. Perkara yang boleh merosakkan manusia bukan hanya minuman keras saja malah opium, ganja, caras (sejenis benda yang memabukkan dan dihisap seperti tembakau), bhang (sejenis daun yang memabukkan), perahan anggur, dan apa sahaja yang boleh menjadikan seseorang itu ketagih, semua itu boleh merosakkan otak yang akhirnya menghancurkan diri sendiri.

Jadi, jauhkan diri kamu daripadanya. Kita tidak faham kenapa kamu menggunakan benda-benda seperti itu sedangkan musibat yang disebabkan olehnya setiap tahun, ribuan orang seperti kamu yang ketagih akhirnya berlalu dari dunia ini, lain lagi azab akhirat yang menanti di sana.

Jadilah kamu insan yang bertakwa supaya umur kamu dipanjangkan dan mendapat berkat dari Tuhan. Menikmati kehidupan yang melampaui batas adalah satu kehidupan terlaknat. Berkelakuan buruk yang melebihi had adalah satu kehidupan terlaknat. Lalai dari Tuhan dan tidak berperikemanusiaan terhadap hamba-hamba-Nya melebihi had juga adalah kehidupan terlaknat.

Setiap hartawan akan ditanya tentang hak-hak mereka terhadap Allah dan hak-hak terhadap manusia sama seperti yang ditanya kepada orang miskin, malah mungkin lebih daripada mereka. Jadi, alangkah malangnya nasib orang yang bergantung sepenuhnya kepada kehidupan yang singkat ini lalu memalingkan muka daripada Allah secara menyeluruh.

Dan mereka menggunakan benda-benda yang telah diharamkan oleh Allah tanpa teragak-agak seolah-oleh yang haram telah menjadi halal atas mereka. Dalam keadaan marah, mereka bersedia mencaci-maki orang lain seperti orang gila, dan tanpa teragak-agak lagi mereka boleh mencapai tahap mencederakan dan juga membunuh. Dan apabila dikuasai oleh nafsu syahwat, mereka akan memuaskan nafsunya walaupun dengan cara yang amat memalukan. Oleh karena itu, mereka tidak akan pernah mengenal kesejahteraan hidup yang hakiki sehingga maut menjemputnya.

Wahai orang-orang yang disayang! Kamu sekalian datang ke dunia ini hanya untuk sebentar sahaja, dan itu pun sebahagian besar kehidupan telah kamu lalui. Jadi, janganlah membangkitkan kemarahan Tuhan kamu. Suatu kerajaan manusia yang berkuasa atas kamu, apabila marah terhadap kamu, ia boleh membinasakan kamu. Jadi fikirkanlah, bagaimanakah kamu boleh menyelamatkan diri dari kemurkaan Tuhan?

Jika kamu seorang muttaqi pada pandangan Allah Ta'ala, maka tidak ada yang akan dapat menghancurkan kamu sebab Tuhan sendiri yang akan memberikan perlindungan terhadap kamu, dan musuh kamu yang selalu mengekori kamu tidak akan dapat menundukkan kamu. Jika tidak, nyawa kamu tidak ada yang melindunginya, dan sama ada kamu takut kepada musuh atau terperangkap dalam musibah, kamu menjalani kehidupan yang tidak tenang, dan dalam hari-hari terakhir kehidupan, kamu melaluinya dengan penuh kesedihan dan kemarahan.

Tuhan akan menjadi Pelindung bagi orang-orang yang bersama-sama dengan-Nya. Jadi, datanglah kepada Tuhan dan tinggalkanlah segala perkara yang menentang-Nya dan jangan malas dalam melakukan kewajiban yang diperintahkan oleh-Nya. Dan jangan menzalimi hamba-hamba-Nya dengan tangan atau mulut kamu. Takutlah kamu selalu kepada kemurkaan dan kemarahan dari langit, sebab inilah jalan untuk memperoleh keselamatan.

Wahai Para Ulama Islam!

Wahai ulama-ulama Islam! Janganlah tergesa-gesa untuk mendustakan aku sebab banyak sekali rahsia-rahsia yang tidak dapat difahami dengan segera oleh manusia. Janganlah juga tergesa-gesa menolak sesuatu hal sebaik sahaja mendengarnya sebab ini bukan cara orang bertakwa. Sekiranya dalam diri kamu tidak terdapat kesalahan-kesalahan, dan sekiranya kamu tidak silap dalam memahami beberapa hadis-hadis, maka kedatangan **Maseeh Mau'ud** (Al-Maseeh yang dijanjikan) sebagai **Hakim** itu adalah sia-sia.

Menurut akidah kamu bahawa Isa ibnu Maryam datang dari langit akan bergabung dengan Mahdi dan memerangi orang ramai untuk menjadikan mereka Islam secara paksa. Ini satu akidah yang boleh memburukkan nama Islam. Di manakah tertulis di dalam Qur'an Syarif bahawa untuk menyebarkan agama itu boleh menggunakan jalan kekerasan? Malah Allah Ta'ala di dalam Quran Syarif berfirman **لَا إِكْرَاهَ فِي الدِّينِ** yakni "tidak ada paksaan di dalam urusan agama". (Al-Baqarah:257).

Oleh sebab itu, dari manakah Isa Ibnu Maryam mendapat kebenaran untuk menggunakan kekerasan? Seluruh isi Qur'an Syarif berulang-ulang menyatakan bahawa dalam urusan agama tidak ada paksaan, dan secara jelas diperlihatkan oleh Rasulullah

sallallaahu alaihi wasallam, bahawa peperangan yang berlaku pada waktu itu bukan bertujuan untuk menyebarkan agama. Malah, ia bertujuan:-

1. Sebagai hukuman, yakni memberikan hukuman terhadap mereka yang telah membunuh sejumlah besar orang-orang Muslim, dan mengusir beberapa yang lain keluar dari kampung halaman dan mereka begitu sangat zalim. Allah Ta'ala berfirman:

أُذِنَ لِلَّذِينَ يُقْتَلُونَ بِأَنَّهُمْ ظَلَمُوا وَإِنَّ اللَّهَ عَلَىٰ نَصْرِهِمْ لَقَدِيرٌ ﴿٤٠﴾

- Yakni, “Telah diizinkan bagi mereka yang telah diperangi, disebabkan mereka telah dianiaya. Dan sesungguhnya Allah berkuasa menolong mereka” (Al-Hajj:40). Ataupun:-
2. Peperangan itu sebagai mempertahankan diri. Yakni mereka yang berusaha sedaya upaya untuk menghapuskan Islam atau di dalam negara sendiri dihalang secara keras untuk menyebarkan ajaran Islam, sebagai pertahanan, mereka boleh membalas serangan. Ataupun:-
 3. Peperangan dilakukan untuk mencapai kemerdekaan dalam negara.

Selain daripada tiga keadaan ini, Rasulullah sallallaahu alaihi wasallam dan para khalifah baginda yang suci tidak melancarkan peperangan dengan maksud yang lain, malah Islam cuma bertahan di atas kezaliman kaum lain yang gambarannya tidak terdapat pada bangsa yang lain. Maka, bagaimana pula keadaan Isa dan Mahdi yang mana sejurus datang, terus sahaja mula membunuh orang ramai?

Golongan Pemerintah Dan Bangsawan Negara

Begitu juga golongan pemerintah dan golongan bangsawan negara, mereka langsung tidak ada hubungan dengan agama, mereka tenggelam dalam bid'ah siang dan malam sehingga tidak tahu menahu tentang kesulitan dan musibat yang menimpa Islam. Jika kamu pergi ke majlis-majlis mereka, maka sebagai ganti Al-Qur'an dan buku-buku Hadis, yang ada di sana ialah rebana, gendang, penyanyi dan lain-lain yang hanya memperlihatkan bid'ah-bid'ah.

Walaupun demikian, mereka mendakwakan diri sebagai pelindung orang Islam dan pengamal sunnah-sunnah Nabi sallallahu alaihi wasallam. Di kalangan mereka, ada juga yang memakai pakaian wanita, di tangan mereka ada inai dan memakai gelang, dan membaca syair-syair berkenaan dengan Al-Qur'an Syarif juga mereka suka dibuat dalam majlis-majlis mereka. Ini adalah karat lama yang tidak ada di fikiran bahawa ia akan hilang. Namun begitu, Tuhan akan memperlihatkan kudrat-Nya dan akan memelihara Islam.

Setiap orang boleh berkata bahawa saya cinta kepada Tuhan, tetapi Tuhan hanya mencintai orang yang kecintaannya disaksikan oleh langit.

Setiap orang boleh berkata bahawa mazhab (pegangan agama) saya benar, tetapi mazhab sebenar itu dimiliki oleh orang yang mendapat nur (cahaya) di dunia ini.

Setiap orang boleh berkata bahawa saya akan mendapat keselamatan, tetapi orang yang perkataannya benar adalah mereka yang melihat nur (cahaya) keselamatan di dunia ini.

Jadi, berusaha agar kamu menjadi orang yang dicintai Allah supaya kamu terselamat dari musibah.

Sekarang Ini Masa Berkhidmat Untuk Agama

Wahai orang-orang tersayang! Waktu ini adalah masa untuk agama dan untuk mengkhidmati agama. Hargailah waktu sekarang ini kerana ia tidak akan berulang. Kenapa kamu lemah semangat sedangkan kamu mengikuti Nabi Muhammad sallallaahu alaihi wasallam yang terpilih itu? Perhatikan contoh teladan baginda dalam diri kamu sehingga malaikat di langit pun akan kehairanan atas kejujuran dan kesucian kamu lalu mengirimkan doa keselamatan untuk kamu.

Sekarang saya hendak mengakhiri tulisan ini dan berdoa supaya ajaranku ini bermanfaat untuk kamu, dan semoga lahir perubahan dalam hati kamu seolah-olah kamu menjadi bintang-bintang di bumi sehinggakan bumi bercahaya dengan nur yang kamu dapat daripada Tuhan kamu.

Amiin, summa Amiin.

-----<>-----

Diterjemahkan daripada:

Hamari Ta'lim (Urdu), Mirza Bashir Ahmad

Oleh:

Salahuddin Syed Ali

Sabah, Malaysia

25.05.2012

Oleh karena itu, wahai sekalian orang yang merasa dirinya diakui sebagai warga Jemaatku, kamu sekalian di langit akan dianggap sebagai warga Jemaatku apabila kamu benar-benar melangkahkan kaki kamu di jalan takwa.

Oleh karena itu, dirikanlah solat lima waktu dengan penuh rasa ketakutan dan pemusatan pikiran, seolah-olah kamu melihat Tuhan. Dan sempurnakanlah puasa-puasa kamu untuk Allah dengan penuh ketulusan. Setiap orang yang sudah layak membayar zakat, mereka hendaklah membayar zakat. Dan barangsiapa yang telah berkewajiban untuk menunaikan ibadah Haji dan tanpa ada suatu halangan, mereka hendaklah menunaikan ibadah haji.

Wahai ulama-ulama Islam!
Janganlah tergesa-gesa untuk mendustakan aku sebab banyak sekali rahsia-rahsia yang tidak dapat difahami dengan segera oleh manusia. Janganlah juga tergesa-gesa menolak sesuatu hal sebaik sahaja mendengarnya sebab ini bukan cara orang bertakwa.

SYARAT-SYARAT BAI'AT DALAM JEMAAT AHMADIYAH

**ORANG YANG BAI'AT, BERJANJI DENGAN
HATI YANG JUJUR BAHAWA:**

1. Pada masa akan datang hingga masuk ke dalam kubur, akan sentiasa menjauhi syirik.
2. Akan sentiasa menghindarkan diri dari segala perbuatan bohong, zina, pandangan berahi terhadap bukan muhrim, perbuatan fasiq, kejahatan, aniaya, khianat, mengadakan huru-hara, memberontak, serta tidak akan dikalahkan oleh hawa nafsunya meskipun bagaimana juga dorongan terhadapnya.
3. Akan sentiasa mendirikan sholat lima waktu dengan tidak ada kecualinya menurut perintah Allah dan Rasul-Nya. Dan dengan sekuat tenaganya berusaha mengerjakan sholat Tahajjud, dan membaca salawat ke atas junjungan Yang Maha Mulia Rasulullah^{SAW}, dan setiap hari akan membiasakan diri mengucapkan pujian dan sanjungan terhadap Allah dengan mengingat kurnia-kurnia-Nya dengan hati yang penuh rasa kecintaan.

4. Tidak akan mendatangkan kesusahan apapun yang bukan pada tempatnya terhadap makhluk Allah umumnya, dan kaum Muslimin khususnya, kerana dorongan hawa nafsunya samada dengan lidah, tangan atau dengan cara apa pun juga.
5. Akan tetap setia terhadap Allah Ta'ala dalam segala keadaan susah atau senang, suka atau duka, nikmat atau musibat, pendeknya akan redha di atas segala keputusan Allah. Dan sentiasa akan bersedia menerima segala kehinaan dan kesusahan pada jalan Allah. Tidak akan memalingkan muka dari Allah Ta'ala ketika ditimpa suatu musibah bahkan akan terus maju ke hadapan.
6. Akan berhenti dari adat yang buruk dan dari menurutkan hawa nafsu, dan betul-betul akan menjunjung perintah Al-Qur'an atas dirinya. Firman Allah dan sabda Rasul itu menjadi pedoman baginya dalam setiap langkahnya.
7. Benar-benar akan meninggalkan takbur dan sombong, akan hidup dengan merendah diri, beradat lemah lembut, berbudi pekerti yang halus dan sopan.

8. Akan menghargai agama, kehormatan agama dan mencintai Islam lebih daripada jiwanya, harta bendanya, anak-anaknya dan dari segala apa yang dicintainya.
9. Akan selamanya menaruh perasaan belas kasihan terhadap semua makhluk Allah, dan sedapat mungkin berusaha untuk memberikan faedah kepada umat manusia dengan segala kekuatan dan nikmat yang telah dianugerahkan oleh Allah Ta'ala kepadanya.
10. Akan mengikat tali persaudaraan dengan hamba Allah Ta'ala ini (Hazrat Maseeh Mau'ud & para Khalifah) semata-mata kerana Allah dengan pengakuan itaat dalam hal ma'ruf dan akan berdiri di atas perjanjian ini hingga mautnya. Dalam tali persaudaraan ini begitu tinggi hendaknya sehingga tidak diperoleh tandingannya, baik dalam ikatan persaudaraan dunia, atau dalam kekeluargaan, atau dalam segala macam hubungan antara hamba dengan tuannya.

Dalam zaman ini, persekitaran dunia banyak memberikan pengaruh yang menggelapkan hati manusia, dan orang yang mendakwakan diri sebagai orang beriman pun tidak mengetahui bentuk keimanan yang sebenar, dan juga tidak tahu mengenai ketauhidan yang hakiki. Atas sebab itu, timbul dalam hati saya untuk mempersembahkan ringkasan ajaran daripada Hazrat Maseeh Mau'ud alaihissalam bersumberkan kitab beliau Bahtera Nuh (Kisyti Nuh) untuk mereka yang hendak mencari kebenaran bagi menyelamatkan diri dari musibat yang sangat berbahaya ini. **Dalam kitab ini memang merujuk kepada anggota Jemaat Ahmadiyah, namun ia juga berguna untuk umat Islam yang lain.** Dan inilah cahaya hidayat yang boleh menghidupkan kembali cahaya hati yang telah padam, bukan hanya untuk umat Islam, malah setiap insan yang mempunyai keinginan untuk mencari kerohanian dan kebenaran. Ringkasan ini adalah perkataan Hazrat Maseeh Mau'ud alaihissalam sendiri. Jadi, wahai saudara sekalian, bacalah buku ini dan ambil manfaat daripadanya. Kemudian baca kembali dan ambil manfaat daripadanya.

Yang lemah,

Mirza Basyir Ahmad

Rabwah.

22 September 1958